



ԳԼԽԱՎՈՐ ԽՄԲԱԳՐԻ ՍՅՈՒՆԱԿ

Սիրելի ընթերցող,

Քո դատին է ներկայացվում «Բանբեր Հայաստանի գրադարանների» հանդեսի երրորդ համարը: Հոդվածներ են ներկայացված հետևյալ թեմատիկ ուղղություններով՝ «Բուհական գրադարաններ», «Գրադարանային վիճակագրություն և վերլուծություն», «Գրքագիտություն», «Գրադարանային համաժողովներ», «Մշակութային ժառանգություն», «Գրադարան. տեսություն և պրակտիկա»: Ներառված են նաև հաղորդումներ:

Ընթերցողի դատին ենք ներկայացնում «Շարժական մատենադարան» խորագրով հոդվածը՝ տպագրված Թիֆլիսի «Մանկավարժանոց» ամսագրում (1884 թ., թ. 1, էջ 48-51): Ուրախալի է, որ 19-րդ դարավերջին հայ մանկավարժական միտքը ծանոթ է եղել համաշխարհային գրադարանային գործի կազմակերպման սկզբունքներին, և հոդվածում արտահայտված մտքերը արդիական են նաև այսօր:

Անդրադարձ կա հայկական գրադարանների միջազգային չորրորդ համաժողովին: Հաճելի է փաստել, որ համաժողովը դառնում է ավանդական, որի համար երախտապարտ ենք Ն.Ս.Օ.Տ.Տ. Գարեգին Բ. Ամենայն Հայոց Կաթողիկոսին և ՀՀ Մշակույթի նախարարությանը:

Ներկայացված են Հայաստանի գրադարաններում անցկացված հետազոտությունների արդյունքները, որոնցում կիրառված են գրադարանային շուկայաբանության և գրադարանային վիճակագրության մեթոդները:

Լիահույս ենք, որ նման հետազոտությունների քանակը ժամանակի ընթացքում կավելանա: